

四庫全書

集部

欽定四庫全書

元詩選初集卷六十三

庶吉士顧嗣立編

華布衣幼武

幼武字彥清號栖碧無錫州人家素饒財少孤  
奉母名聲藉甚諸公間人有援之仕者力辭不  
就明洪武乙卯卒年六十九京口陳子貞戲題  
其藁曰黃楊謂其愛詩甚篤而奪于多事未肆  
然為之如黃楊之厄閏而不長也今觀其集中

所載云只尺黃楊樹婆娑枝幹重葉深團翡翠  
根古踞虬龍歲歷風霜久時霑雨露濃未應逢閨  
厄堅質比寒松則其所以取名之意或別有在  
歟

送族姪擴之通州

吾族最金盛家聲詩禮傳自遭喪亂後誰能事陳編猶  
子苦好學鄉間稱獨賢文采珊瑚枝照映棠棣篇時同  
竹林會嘯咏相周旋一朝攜酒至別我荒城邊問渠欲

何之言將適通川通川渺何許遠在滄海壩府侯朱夫  
子招我開講筵老懷極慰喜汝去毋留連吹噓千里外  
感激故人憐修程盡努力慎勿中道捐蛟龍起春雷鵬  
鷃搏秋天物遇各有時立功須盛年此行非草草著鞭  
宜爾先要登青雲路忠義尚勉旃舟發梁溪水帆拂狼  
山煙骨肉重相思兩地心懸懸長江浩無波擊楫秋風  
前行當賦清句懷此山中泉

次元翬見寄韻

通衢一傾蓋分首猶惜別況是忘年交離緒那可說蟬  
鳴野外秋鴈叫沙頭月永保松柏姿同盟歲寒節

鴈南飛

至正十年秋  
懷遠人作

鴈南飛飛不住莫莫朝朝不穩棲飛向水窮山盡處水  
窮山盡天南頭年來有客離家愁天空無雲明月夜千  
里萬里清光流家園零落秋風遍人聞鴈聲淚如綫鴈  
兮鴈兮可奈何稻粱多處多網羅

編籬曲

編竹籬密密編朝禦雞犬入莫防豺虎穿交加編聯互  
相倚竹密藤纏堅莫比春風披拂百花開一片繁華如  
錦綺君不見西家有籬編不密夜夜驚呼防盜賊願言  
兄弟莫相疑明日齊心編竹籬

### 義兵行

風蕭蕭雨淒淒義兵起程行路迷腰刀手槍耀光輝青  
衫白帽行隊齊問渠遠行將何之官司召募征江西妻  
兒父母夾道號我今與汝生別離生別離不得已在家

出征同一死麥禾滿田穗將結皇天淫雨無時歇去年  
秋旱號飢寒今年夏麥不得餐幸逢此地無爭戰供給  
軍需民力乾生為浙西農死為江西卒迴首語妻兒何  
處收吾骨率土皆王民安敢辭苦役但愧扶犁手疇能  
用矛戟願得將相俱賢才埽除盜賊無纖埃義兵歸來  
舊田里賣刀買牛復生理

養竹軒歌為周莊具遠子道賦

高軒公子良不俗不種奇花種修竹奇花照眼一時紅

修竹虚心萬年綠春雷擊地新筍生龍角森森那忍觸  
自鉏暖土厚栽培手挈銀鉏細澆沃深根埽除螻蟻窟  
香葉終期鳳凰宿日使霑濡雨露恩歲寒豈憚冰霜酷  
猗猗繞戶矗琅玕含霧連煙比淇澳招搖皓月金瑣碎  
勾引清風聲戛玉炎天展簟卧蒼雪春日聽鶯泛醺醪  
可能一日暫相忘坐對此君看不足君不見白樂天重  
言養竹比養賢又不見東坡詩無竹士俗不可醫君今  
有竹善培養會看直拂青雲上



茶蘼歌

丹葩醉染猩猩血，素萼便娟比霜雪。呈妖逞豔豈足貴，  
含芳嗜潔誇清絕。茶蘼飽浥春雨膏，玲瓏翦刻英瓊瑤。  
千金腦麝和淑質，萬箇玉蝶紫柔條。坐看明月花梢上，  
便應題作清虛勝。醉眠花底不須歸，狼籍苔茵空撫掌。  
先生愛花何太濃，對花一飲揮千鍾。昔逢端伯稱韻友，  
我欲結好慚衰容。莫教搖落西風後，賈島留題傳不朽。  
憐君為作茶蘼歌，多情又釀醪醕酒。

風棚

百尺虛結構松風起四簷遂令秋滿屋何用畫垂簾蔽  
日雲常在當窗雨不霑翛然無限意叢竹淨相兼

清坐

驅馳欣暫息清坐感餘春細雨偏宜草疎簾不隔塵山  
禽時引子庭鶴晚隨人幾負林泉約空嗟頭上巾

客樓夜雨

城郭易為熱江雲起不難電光生夜白雨氣入樓寒書

葉仍防潤。燈花不耐看。祇緣聽亦慣。竟夕睡偏安。

宿蠡口

春風吹短櫂。迤邐望歸程。刁斗溪邊戍。旌旗野外營。市橋

人迹少。官路馬蹏輕。

一作平

欲向

一作過

東湖去

一作宿

邊烽

永夜明

一作止夜行

久雨

江雨灑還稀。江雲溼更低。不愁吳水闊。惟恨楚山迷。野

鶴思高舉。林鳥慕穩棲。漸看晴景好。可得溷塗泥。

宿隱微山房

二月蘭舟泊上宮  
春雲不雨玉壇空  
苔生白石斑斑綠  
魚養丹池箇箇紅  
對酒燭分花底夜  
出簾香散竹間風  
高寒未覺仙臺遠  
只比相逢似夢中

遊碧浪湖簡同行沈高士

浮玉山邊晚繫舟  
荻蔣蕭瑟似新秋  
碧天萬里寫銀漢  
明月一輪當柁樓  
每媿塵勞成白首  
喜從仙御作清遊  
酒杯未落南風起  
又挂歸帆托順流

次楊文昭見寄韻

一別故人知幾時，相思每誦隔年題。  
兵戈滿眼愁無那，風雨連牀夢轉迷。  
遙矚層城堅鐵石，俯憐荒野困塗泥。  
興來每欲操舟去，竚待西邨罷鼓鞀。

斑竹簾

湘妃淚灑碧琅玕，翦織疎簾拭未乾。  
細縷引風宜隔暑，溼痕含雨欲生寒。  
銍前照耀琉璃潔，月下爛斑玳瑁看。  
直幹盡輸兵革用，高堂舒卷莫摧殘。

題陽山顧碧溪詩卷

聞說山中顧隱君，幽居不與俗人羣。  
愛看舞鶴護蒼蘚，淨埽落花留白雲。  
李愿已刊盤谷序，稚圭休擬北山文。  
一溪春水連天碧，肯著孤舟載月分。

寒食感懷

寒食維舟江上邨，臨風西望黯銷魂。  
花將春色歸流水，雲繫愁心入故園。  
丘壑不知誰灑埽，藤蘿應復自滋蕃。  
衰年尚作無家客，只合當時住鹿門。

寄趙易窗高士慶雲岡上人

昨宵風雨釀春寒  
曉色開晴露未乾  
棋局定須尋李遠  
杖藜還肯過蘇端  
緇經坐榻呼龍守  
點易虛窗倩鶴看  
暫假飛鳬挽飛錫  
樵蘇不爨罄交懽

秋夜有感

澤國秋來夜氣涼  
飄零猶自未還鄉  
蟋蟀泣露梧桐井  
絡緯縑風薜荔牆  
只尺故園千里夢  
亂離華髮十年霜  
仲宣樓上長回首  
烽火連山欲斷腸

次韻題畫

海石涵秋水風篁生晚涼孤蓬初歇雨和月度瀟湘

江南曲

即上渡江船妾倚江邊樹空挽柳絲長繫郎船不住

擬比紅兒賦解語花二首

綽約柔情不自勝翠圍紅繞幾層層隔簾立盡闌干月  
却訝真真喚即應

霧縠雲綃淡淡妝微風吹散鬱金香臨風一片傷春意



欲向何人訴斷腸

題桃花十二紅圖

枝上棲禽五色毛  
睡酣花氣日初高  
江南一覺繇華夢  
滿地荆榛叫百勞

春日偶成二首

城頭楊柳綠如雲  
城下官河水拍春  
一片江山元不改  
畫船都是異鄉人

船頭細雨溼漁蓑  
船尾桃花漾碧波  
借問東君知得否

江南春色已無多

桃源圖

流水桃花世外春  
漁郎曾此得通津  
當年只記秦猶在  
不道山河又屬人

雲林畫山水竹石

秋雲無影樹無聲  
湛湛長江鏡面平  
遠岫煙銷明月上  
小亭危坐看潮生

次韻曲林春雪

賸喜滿天飛玉蝶不嫌幽谷阻黃鸝夜深錯認催花雨  
夢覺驚聞折竹聲

丁孝子鶴年

鶴年以字行一字永康西域人也曾祖阿老丁  
為巨商以其貲歸元世祖世為顯官父職馬祿  
丁官武昌縣達魯噶齊有惠政留葬焉鶴年年  
十八值兵亂倉卒奉母走鎮江母歿鹽酪不入  
口者五年避地越江上又徙四明行臺省交辟

不就時方氏深忌色目人鶴年轉徙逃匿旅食  
海鄉為童子師或寄居僧舍賣藥以自給先是  
生母馮阻絕東邨病死瘞廢宅中道既通鶴年  
還武昌痛哭行求夢其母以告蹤跡得之齧血  
沁骨棺斂以葬晚年屏絕酒肉廬父墓以終其  
身明永樂間卒烏斯道為作丁孝子傳戴叔能  
作高士傳以申屠蟠擬之序其詩謂注意之深  
用工之至尤在于五七言近體澹居老人題海

巢集亦云忠義慷慨有騷雅之意鶴年家世仕  
元諸兄之登進士第者三人遭時兵亂不忘故  
國嘗有句云行蹤不逐臬東徙心事惟隨鴈北  
飛亦可悲也錄其詩為元季諸人後勁而兩兄  
之作附焉

採蓮曲

採蓮復採蓮仍唱採蓮曲若欲知苦心須食蓮中肉採  
蓮復採蓮踟躕一何久不愁花妒容惟恐刺傷手採蓮

復採蓮藕亦不可棄中有不斷絲似妾纏絲意採蓮復  
採蓮爭如採荷好花謝葉獨存團圓以終老採蓮復採  
蓮湖水清且深徒能照妾面不能照妾心採蓮復採蓮  
下有孤鴛鴦秋花不結實夜夜守空房蓮開花覆水蓮  
謝藕在泥不學青萍葉隨波東復西朝採並蒂蓮暮綰  
同心結不學楊柳枝含嚙送離別蓮舟何處來同住西  
湖口郎憐波上花妾愛泥中藕藕有青白節花有豔冶  
容郎心異妾心三歎掩歸蓬

此詩誤作絕句乃是古  
樂府西洲曲等體耳

題天柱山圖

拔翠五雲中，擎天不計功。  
誰能凌絕頂，看取日升東。

畫蟬

飲露身何潔，吟風韻更長。  
斜陽千萬樹，無處避螳螂。

題江亭柳色圖

有懷故人  
劉庸道

昔年醺酒地，江漢一茅亭。  
同會人何在，東風柳又青。

次先兄太守題竹韻

先兄死事之十有七年于故  
史董文中家見所作因雪涕

謹次

其韻

玉筍謝朝班西風海國寒無人知苦節落日下長安

長江萬里圖二首

將歸武昌自賦

長江千萬里何處是儂鄉忽見晴川樹依稀認漢陽  
長嘯還江國遲回別海鄉春潮如有意相送過潯陽

題落花芳草白頭翁

草長連朝雨花殘一夜風青春留不住唬殺白頭翁

汨汨

汨汨在塵埃羈懷不暫開病將顏玉去愁送鬢絲來抬



隱慚高蹈扶顛乏大才行藏成兩失回首有餘哀

送四兄往杭後寄

臨別強言笑獨歸情轉哀離魂悽欲斷孤抱鬱難開  
太守隄邊柳徵君宅畔梅過逢如見憶煩寄一枝來

逃禪室卧病簡諸禪侶

高秋多病客古寺寄黃昏野迴常疑虎天寒早閉門  
離愁鐙下影鄉淚枕邊痕賴有諸禪侶情親似弟昆

登北固山多景樓

風月無邊地乾坤有此樓城隨山北固潮蹴海西流眼  
界寬三島胸襟隘九州階前遺狼石誰復話安劉

幽期

何處赴幽期青林白谷陞谷虛秋氣早林茂曙光遲談  
罷風生塵歌闌月在巵謀身良自足何補國安危

春日海邨三首

地僻囂塵遠人稀習俗淳花時恒獨往隨意蹋晴春斑  
竹過頭杖烏紗折角巾蕭然多古意何媿葛天民

門巷絕輪蹄春深綠草齊風光不相負泉石且幽棲  
慢通花氣移牀避燕泥時時得佳句自向竹間題

每恨韶華晚仍嗟老病催閉門花落盡隱几鳥飛回  
引睡書千卷消愁酒一杯平生志士氣此日已成灰

一作執相

悵

寓慈湖僧舍次龍子高提舉韻

迢遞過蘭若淹留為竹林疎鐘雲嶠迴孤燭雨窗深  
長嘯非懷昔狂歌豈避今祇緣諸漏盡不受一塵侵

武昌南湖度夏

南浦幽棲地當門  
卷畫開青山入雲去  
白雨渡湖來石潤生  
龍氣川光媚蚌胎  
芙蕖三百頃何處著  
炎埃

客懷

此生何坎壈終歲客  
他鄉病骨驚秋早  
愁心識夜長文章非  
豹隱韜畧豈鷹揚  
磨滅餘方寸還同百鍊剛

病衰

病骨秋增痛衰容日減華  
臉霞憐竹葉鬢雪妒菱花  
往

事嗟何及歸程望轉賒少年歌舞地此日屬誰家

題畫

荒荒野日低漠漠江雲冷喬林延莫光澄波浴秋影高  
人千載懷乾坤一漁艇

歲晏百憂集二首

歲晏百憂集獨坐彈鳴琴琴聲久不諧何以怡我心拂  
衣出門去荊棘當道深還歸茅屋底抱膝梁父吟

歲晏百憂集擊節發商歌商歌未終調淚下如懸河故

鄉渺何許北斗南嵯峨有家不可歸無家將奈何

悼亡

別時如玉人歸來死生隔日莫泣孤墳音容杳難得惟  
餘墳上草猶帶羅裙色

逃禪室述懷十六韻

出處兩茫然低徊每自憐本無經國術仍乏買山錢故  
邑三千里他鄉二十年力微歸計杳身遠客心懸桃李  
誰家樹禾麻傍舍田鶉衣秋屢結蝸室歲頻遷逝水終

難復寒灰更不然久要成齟齬多病復沈緜俛仰衷情  
倦棲遲野性便延徐誰下榻訪戴獨迴船恥灑窮途泣  
閒修淨土緣談玄分上下味道悉中邊有相皆虛妄無  
才幸苟全棲雲同白鹿飲露效玄蟬高蹈慚真隱狂歌  
媿昔賢惟餘空念在山寺日逃禪

送鐵佛寺盟長老還襄陽

盟居襄陽父死方在殯  
遇亂奉母逃難江南餘

三十年常典藏鑰于蔣山主武昌鐵佛寺而重  
興之及今道路既通乃奉母北歸而葬其父喪  
士大夫以為方外所未有咸作詩文美  
之鶴年因掣五言排律二十韻附卷末

襄漢揚波日江湖避地時行行隨老母處處禮名師雲  
水元無住風塵信所之睦州勤奉養江革備艱危掌鑰  
鍾山下傳鐙鄂渚潛剽龍藏典幾咏鶴樓詩深慨叢  
林廢真成一木支銅山頻閱世鐵佛重開基法几雕文  
具霸礪刺綵絲雲鐘晨縹緲月殿夜參差已悟無生法  
還興罔極悲他鄉流徙遠先壟奉遷遲瀕洞今方息旋  
歸故可期望雲雙淚瀉計日寸心馳官柳催飛錫曇花  
侑奠儀既明埋玉理豈是繫珠癡定應牛眠兆母生觸



鹿疑春暉憐舊線秋露薦新祠生死俱無憾諸方起孝思

贈相者姜奉先

宋忠臣姜才之孫

德祐忠臣好孫子爛爛目光巖電紫人間富貴等浮雲  
瑣瑣何須挂脣齒黯澦險蜀道難曳裾旁人多厚顏留  
取乾坤雙老眼夕陽牛背看青山

題餘姚葉敬常州判海隄卷

補先兄太  
守遺闕

陰霓夜吼風雨急坤維震蕩玄冥立桑田變海人為魚

葉侯訴天天為泣侯奉天罰誅妖霓下平水土安羣黎  
嶙峋老骨不肯朽化作姚江捍海隄海隄蜿蜒如削壁  
橫截狂瀾三萬尺隄內耕桑隄外漁民物欣欣始生息  
潮頭月落曉早鴉柴門半啟臨漚沙柳根白舫賣魚市  
花底青帘沽酒家花柳邨邨各安堵世變侯仙倏成古  
侯雖已矣遺愛存時聽叢祠咽簫鼓人生何必九鼎榮  
廟食貴有千載名君不聞一杯河水決瓠子沈馬親勤  
漢皇祀又不聞一帶江波泛蜀都刻犀厭勝秦人愚江

平河塞世猶駭何況堂堂障滄海論功不啻濟川才砥  
柱東南千萬載嗚呼只今四海俱橫流平地風波沈九  
州蒼生引領望援溺州縣有官非葉侯禦災誰復憂民  
憂

寄武昌南山白雲老人

姓衛字均執先人時故舊  
家居未嘗入城市聞鶴年

辛苦遠還遣子弟問遺不絕鶴年足疾日  
劇弗克往往拜牀下謹奉拙詩少致謝忱云

故人家住南山下心與白雲共蕭灑芝草遙賡黃綺歌  
蓮花近入宗雷社嗟予江海避風塵白首歸來失所親

青眼相看如昔日只有南山與故人

兀兀

數莖白髮鏡中新兀兀窮年媿此身萬里雲霄雙倦翼

一作羽

千尋江漢一窮鱗望鄉薄莫憑西日去國中宵禮

北辰客路漸遙身漸老此生何以報君親

勞勞

閭闔排雲事已休勞勞猶恥為身謀數莖白髮未為老  
一寸丹心都是愁燕代地高山北峙荆陽天闊水東流

英雄已去空形勝  
劍氣中宵射斗牛

托克太師

淮海重聞斧鉞臨  
一時黎庶盡傾心  
雷霆聲播天威遠  
霖雨恩添帝澤深  
暗室有蠅污白璧  
明廷無象鑄黃金  
風塵未息英雄死  
坐對江山慨古今

靳公子

中朝公子多才俊  
蕭灑風塵獨靳侯  
白鴈久無天上信  
黑貂漸敝雪中裘  
虛堂簾影遲遲晝  
別館鐙光淡淡秋

到手深杯須劇飲醉鄉消得古今愁

故宮人

粉愁香怨不勝情強整殘妝對老兵別殿金蓮餘故步  
後庭玉樹變新聲眼穿鴈字雲連塞夢斷羊車月滿城  
天上桃開王母去世人誰識許飛瓊

雪後泛東湖

雪後湖山玉作圍小舟乘興弄清輝貪看月裏鷺回舞  
不覺風前鷁退飛雲母屏空春閒寂水晶宮冷晚霏微

仙家一笑乾坤老誰馭瑤池八駿歸

題鳳浦方氏梧竹軒

鳳鳥曾聞此地過至今梧竹滿丘阿政懷翦葉書周史  
却恨翻枝入楚歌金井月明秋影薄石壇風細晚涼多  
中郎去後知音少共負奇才奈老何

存齋詩話云時作者已滿卷此詩一

出皆為  
敘社

莫春感懷二首

杜宇聲聲喚客愁故園何處此登樓落花飛絮成春夢

剩水殘山異昔遊  
歌扇多情明月在  
舞衣無跡彩雲收  
東皇去後韶華盡  
老圃寒香別有秋

四十無聞嬾慢身  
放情丘壑任天真  
悠悠往事杯中物  
赫赫時名扇外塵  
短策看雲松寺晚  
疎簾聽雨草堂春  
山花水鳥皆知己  
百遍相過不厭頻

奉寄王宣慰兼呈九靈先生

別館新城足宴游  
珊珊環珮總名流  
獨推南郭為高士  
共識東陵是故侯  
天上鶯花三月夢  
人間風雨五更愁



行藏盡付浮雲外  
爛醉豐年黍稷秋

奉寄九靈先生二首

先生嘗為  
予作傳

挾海懷山謁紫宸  
擬將忠孝報君親  
忽從華表聞遼鶴  
却抱遺經泣魯麟  
喪亂行藏心似鐵  
蹉跎勲業鬢如銀  
萬言椽筆今無用  
閒向林泉紀逸民

花柳邨邨接海濱  
攜家隨處避風塵  
衣冠栗里猶存晉  
鷄犬桃源久絕秦  
坐對青山渾不厭  
忘機白鳥自相親  
也知出處關時運  
豈但逃名效隱淪

寄定海故將軍邵公輔

往事浮雲杳莫攀壯懷未展鬢先斑  
不聞奉使通銀漢空見將軍老玉關  
故壘荒涼千騎盡滄溟浩蕩一鷗閒  
風塵隨處嚴訶止愁殺田間野獵還

逃禪室與蘇伊舉話舊有感

不學揚雄事草玄且隨蘇晉暫逃禪  
無錐可卓香巖地有柱難擎杞國天  
漫詫丹霞燒木佛誰憐青露泣銅仙  
茫茫東海皆魚鼈何處堪容魯仲連

寄餘姚滑伯仁先生

獨木橋邊薜荔門，全家移住水雲邨。  
援聲專夜丹山靜，蜃氣橫秋碧海昏。  
詩卷自書新甲子，藥壺別貯小乾坤。  
陶漁耕稼遺風在，差勝桃源長子孫。

題太守兄遺槩後

太守兄死，事之明年，篋中得遺詩一卷，伏讀之，次不知涕泗之

橫流也。敬題一詩于後，以紀哀思云。

海國期年政化成，肩輿隨處看春耕。  
正欣雞犬無驚擾，詎意鯨鯢有鬪爭。  
遙島月明虛燕寢，故山雲冷失佳城。

夢回詩句難重得腸斷池塘草又生

兵後還武昌二首

避亂移家大海隈楚雲湘月首頻回歸期實誤王孫草  
遠信虛憑驛使梅天地無情時屢改江山有待我重來  
白頭哀怨知多少欲賦慙無庾信才

亂後還家兩鬢蒼物情人事總堪傷西風古塚遊狐兔  
落日荒郊卧虎狼五柳久非陶令宅百花今豈杜陵莊  
舊遊回首都成夢獨數殘更坐夜長

哭陣亡仲兄烈瞻萬戶

獨騎鐵馬突重圍，斬將搴旗疾似飛。  
金虎分符開幕府，玉龍橫劍衛邦畿。  
委身殉國心方盡，裹骨還鄉願竟違。  
病卧滄江憐弱弟，看雲徒有淚沾衣。

題昌國普陀寺二首

寺在浙江寧波府東南海島間，即昌國州之故墟也。

神鼇屹立戴崔嵬，倏瞰滄溟水。  
一杯積翠自天開，罨畫布金隨地起。  
樓臺祈靈漢使垂，搓到傳法梁僧折。  
葦來若使祖龍知，勝槩豈應驅石訪蓬萊。

昆明劫火忽重然宇內名山悉變遷古剎獨存龍伯國  
豐碑猶記兔兒年三更日浴咸池水八月潮吞渤海天  
雲漢靈槎如可御便應長往問羣仙

樊口隱居

為武昌李均玉作

萬里雲霄斂翼回挂冠高卧大江隈春深門巷先生柳  
雪後園林處士梅翠擁樊山邀杖屨綠浮漢水映尊罍誰  
能領取坡仙鶴月下吹簫共往來

戲贈劉雲翁

千金不惜買新聲  
贏得風流老更成  
銀蠶蒲萄浮臘蟻  
金屏窈窕轉春鶯  
香凝宴寢頻開席  
花暗閒房合度笙  
夜燕未終賓客醉  
莫將明燭照華纓

長江萬里圖

右逾越雋左蓬壺  
萬里提封入壯圖  
斷石雲屯山擁蜀  
驚濤雪立海吞吳  
蟠桃有實來青鳥  
若木無枝駐赤烏  
秦漢經營人盡去  
獨留形勝在寰區

錢唐懷古

錢唐佳麗冠南州故國繇華逐水流  
龍虎已消王霸氣江山空鎖古今愁  
吳臣廟冷潮喧夜宋主陵荒塏倚秋  
最是西湖歌舞地數聲漁笛散鳬鷗

戲贈應修吉

硯溪居士神仙侶短髮蕭蕭雪滿簪  
暖老恨無燕趙玉養生賴有坎離金  
牀頭酒熟留僧飲席上詩成對客吟  
歲晚山空誰是伴北窗梅月最知心

重到西湖



湧金風月昔追歡一旦狂歌變永歎錦繡湖山兵氣合  
金銀樓閣劫灰寒雪晴林墅梅何在霜冷蘇隄柳自殘  
欲買畫船尋舊約荒煙野水浩漫漫

夜宿染上人溪舍

雲去禪關戶牖空清溪碧樹有無中倒涵天影魚吞月  
逆戰秋聲犬吠風見性本圖先作佛勞形翻媿早成翁  
杜陵老去歸無計來往那辭惱贊公

觀太守兄昌國勸農

東臯風日媚新晴太守躬耕曉出城  
裊裊雙旌穿柳過  
蕭蕭五馬蹋花行  
杖藜父老陪諮訪  
騎竹兒童主送迎  
豈意兵荒南北遍  
化行滄海獨昇平

寄西湖林一貞先生

錦繡湖山世絕稀  
東風不放賞心違  
芙蓉楊柳臨清淺  
佛剎仙宮繞翠微  
畫舫載春天上坐  
紫騮馱醉月中歸  
高情獨有林和靖  
門掩晴空看鶴飛

送人歸故園

故園休道已休兵客裏那堪送客行老去別懷殊作惡  
亂餘歸計倍關情孤邨月落羣雞叫絕塞天清一鴈橫  
到日所親如見問浪遊江海負平生

寄胡敬文縣尹

胡遂初真人海上漕舟北還得應奉兄書云胡廣親朋兵後僅二公

寄以詩

湖北衣冠藹士林十年兵革盡消沈崑岡火後餘雙壁  
錦里書回抵萬金鳬舄趨朝天闕近霓裳度曲月宮深  
誰知海上垂綸者去國長懸萬里心

海巢

海上巢居海若降三山眼底小如缸已攀若木為華表  
更立搏桑作翠幢蛟室夜光晴燭戶蜃樓秋影冷涵窗  
鷓鴣夢斷無因到唯有同棲鶴一隻

渡鄞江後寄陸時敏陳可立

小艇橫江捷似飛故人凝睇送將歸過山殘照明紗帽  
渡水浮雲亂葦衣沙鳥水鷗同泛泛岸花汀草各依依  
風塵來往慙經濟擬著漁蓑坐釣磯

元夕

燈火樓臺錦繡筵  
誰家簫鼓夜喧聞  
光移星斗天逾近  
影倒山河月正圓  
金鎖開闔明似晝  
銅壺傳漏迴如年  
五雲不奏霓裳曲  
空使揚州望眼穿

遷葬後還四明途中寄武昌親友

浪遊吳越任荆湘  
來往那辭道路長  
篋內有書慙歷國  
邸中無綬敢誇鄉  
潮生別浦江雲白  
塵起征途野日黃  
若問離人行役苦  
一宵九夢在瀧岡

夢得先妣墓一首小序云已未夏五月還武昌遷葬  
兵後陵谷變遷先妣封樹竟迷所在久尋不得露禱  
大雪中冬十一月二十日夜忽感異夢翌日遂得其  
處賦詩一首以紀歲月其詩曰慈顏幽翳杳難知風  
雪孤筇遍訪之極浦空江泥滑滑荒岡斷壑塚累累  
那知恍惚魂歸夜正是呼號淚盡時孝格皇天吾豈  
敢聊同烏  
鳥報恩私

### 九日登定海虎蹲山

東海十年多契闊西風九日獨登臨天高雲靜鴈初度  
水碧沙明龍自吟籬下菊花憐我瘦杯中竹葉為誰深  
凭高眺遠無窮恨去國懷鄉一寸心

避地

避地長年大海東  
蕭條生計野人同  
深春耒耜孤邨雨  
落日帆檣遠浦風  
那得文章偕隱豹  
聊將音問託歸鴻  
平生自恨無仙骨  
五色蓬萊只尺中

異鄉清明

十年瀕洞家何在  
萬里清明客未歸  
雨憊風憊花亂落  
泥融沙暖燕交飛  
煙生榆柳推遷速  
雲鎖松楸拜掃遲  
旅鴈盡回音問斷  
側身長望淚頻揮

寓奉化寺寄菩提寺主

菩提嶺外空王寺丹磴行穿虎豹羣萬壑濤聲巖下瀑  
千峰雨氣屋頭雲海龍送水金鉶貯天女懷香寶鼎焚  
慙媿無緣塵土客朝朝鐘鼓下方聞

奉寄恕中韞禪師

曾向名山識異人心如木石氣如春坐禪霜葉秋埋膝  
行道天花日繞身有鉢相傳元是幻無錫可卓本非貧  
惟餘潭底中秋月對寫龍峰面目真

時留龍  
峰傳鑑



題東湖青山寺古鼎銘長老鍾秀閣

手開樓閣貯羣經  
面對湖山衛百靈  
玉鏡夜寒通沆瀣  
翠屏秋靜倒空青  
避煙鶴起檐間樹  
行雨龍歸几上鉶  
我亦逃禪雲水客  
便應蕭散共松扃

悼湖心寺壁東丈上人

祇林一葉墮秋霜  
回首滄洲淚兩行  
几上殘經塵已暗  
篋中遺藁墨猶香  
雲迷圓澤三生石  
月冷維摩十笏房  
想像清客何處記  
寒梅的的竹蒼蒼

山居詩二首呈諸道侶

日日看山眼倍明更無一事可關情  
埽開積雪巖前走

一作坐

領取閒雲隴上行不共羽人談  
太易嬾從衲子話

無生劃然時發蘇門嘯遙荅風聲及水聲

嬾散形骸不自持黃冠聊束鬢邊絲  
頻來猿鶴渾相識  
久混龍蛇竟不知養拙最宜情澹泊  
全生深藉德支離  
看雲本自忘飢渴況有冰泉與石芝

自詠五首

長淮橫潰禍非輕坐見中流砥柱傾  
太守九江先歿死  
諸公四海尚偷生  
風雲意氣慙豪傑  
雨露恩榮負聖明  
一望神州一搔首  
天南天北若為情

一夜西風到海濱  
樓船東出海揚塵  
生慚黃歇三千客  
死慕田橫五百人  
紀歲自應書甲子  
朝元誰共守庚申  
悲歌撫罷龍泉劍  
獨立蒼茫望北辰

堂堂至正最多才  
萬國同文壽域開  
漠北諸生登第去  
越南計吏進賢來  
鳳韶九奏黃金殿  
鶴駕三朝白玉臺

回首黃塵揚碧海五雲無處覓蓬萊

六軍遙駐墨河濱故國丘墟詎忍聞露冷金銅應獨泣  
火炎玉石竟俱焚虞淵日莫無還景禹穴秋深有斷雲  
草澤遺民今白髮憑高無柰思紛紛

九鼎神州竟陸沈偷生江海復山林頻繇誰在隆中顧  
憔悴惟餘澤畔吟嚙雪心危天日遠看雲淚盡歲時深  
百年家國無窮事可得忘機老漢陰

上明州太守茶子俊

還武昌遷葬告牒而作

漢江東抱楚山流先壟猶餘土一坏廟冷桐鄉耆舊逝  
田荒粟里子孫愁兵戈隔夢三千里霜露傷心二十秋  
荒隧天寒鳥鳥下空林日落白狐遊碑焚斷石經時變  
盃出遺金有夜偷過客尚知來下馬仙人誰復指眠牛  
擬從樊口遷京口遙別沙頭下石頭高士東窗思致莫  
故人惠麥久維舟已知多病垂垂老敢為長貧故故留  
為政幸逢宗正恕申情當念子平憂勗勞罔報生何益  
存沒沾恩死必酬願及清明三月節一盂麥飯灑松楸

過安慶追悼余文貞公

將軍足馬入舒城，擊賊頻頻訓義兵。  
孝以保家忠徇國，聚而出戰散歸耕。  
團倂月暈全無隙，捷振天威大有聲。  
游說飛書徒間諜，輸誠仗節愈堅貞。  
雲梯屢却妖氛豁，露布交馳殺氣平。  
千里荆揚憑保障，七年淮海賴澄清。  
山深猘獠殲還出，江闊鯨鯢斬更橫。  
外援內儲俱斷絕，裹瘡飲血獨支撐。  
天昏苦霧埋營壘，日落陰風卷旆旌。  
甘與張巡為厲鬼，肯同王衍誤蒼生。  
三千將士皆從死，

百二山河亦繼傾  
靜對風霆思號令  
遙從箕尾識精誠  
頌碑不媿詞臣色  
哀詔偏傷聖主情  
願為執鞭生不遂  
臨風三酹重沾纓

讀應奉兄登科記愴然傷懷因成八韻

射策彤庭被寵榮  
遺經三復若為情  
重傷趙璧經時毀  
翻恨隋珠徹夜明  
洪範有書傳太乙  
佳城無郭葬長庚  
青雲路斷甘淪沒  
碧海塵飛苦變更  
自信為臣當委質  
誰能向賊更求生  
家貧寡弱遺妻子  
道遠存亡隔弟兄

一旦音容成永訣十年涕淚鎮交橫茫茫原隰無求處  
獨立長風送鴈聲

題建昌王子中橋亭八景

橋亭風景洞天如中有儒仙舊隱廬春漲接藍涵蟠螭

灋波春漲內有石梁長橋

曉嵐滴翠溼芙蓉

龍湫朝嵐內有長山峻嶺

受詩華嶽

浮丘館

中華翠巖峰頭有浮丘仙宇

說劍香鑪許令居

香鑪紫煙峰頭有許旌陽

仙居雲外懸崖飛屐上

天寶懸崖

雨中沃壤帶經鉏

田東墓雨

疎鐘

鯨吼霜華重

聖容僧鐘

長笛龍吟月色虛

雲原仙笛

老我塵寰懷



勝景追遊早晚命中車

敬書宸翰後

神龍歸卧北溟波秋絕陰山敕勒歌惟有遺珠光奪目

萬年留得照山河

此云宸翰蓋指  
庚申君手跡也

題第郎天馬圖

春明立仗氣如山顧盼俄空十二閑一去瑤池消息斷  
西風吹影落人間

莫春

楊花榆莢攪晴空上界春歸下界同蜂蝶紛紛竟何在  
獨留杜宇怨殘紅

題畫

江樹青紅江草黃好山不斷楚天長雲中樓觀無人住  
只有秋聲送夕陽

題萬歲山玩月圖

金銀樓觀蔚嵯峨琪樹風涼秋漸多徙倚危闌倍惆悵  
月中猶見舊山河

題畫葡萄

故人毛楚哲作

西域葡萄事已非  
故人揮灑出天機  
碧雲涼冷驪龍睡  
拾得遺珠月下歸

梧桐

井梧徹夜下霜風  
錦繡園林瞬息空  
老盡秋容何足惜  
鳳巢吹墮月明中

聞簫

給喪未必無周勃  
乞食誰能辨伍員  
昨日英雄今日恨

洞簫忍向亂中聞

聞鴈

月落江城轉四更旅魂和夢到灤京  
醒來獨背寒銍坐  
風送長空鴈幾聲

題梅花扇面寄五十僉憲

憶向西湖蹋早春萬花如玉月如銀  
一枝照影臨清淺  
滿面冰霜似故人

題族兄馬子英進士梅花

池館春深看牡丹五陵車馬隘長安誰知凜凜冰霜際  
却是梅花守歲寒

贈表兄賽景初

景初故咸陽王  
賽英赤之孫也

蕭條門巷舊王孫旋寫黃旄換綠尊富貴儻來還自去  
只留清氣在乾坤

題鴈

兵戈故國日彫殘野蔓荒煙白骨寒目送飛鴻度關塞  
有書無處報平安

紅梅

姑射仙人鍊玉砂  
丹光晴貫洞中霞  
無端半夜東風起  
吹作江南第一花

水仙花二首

湘雲冉冉月依依  
翠袖霓裳作隊歸  
怪底香風吹不斷  
水晶宮裏宴江妃

影娥池上曉

一作晚

涼多羅襪生塵水  
不波一夜碧雲凝

作夢醒來無柰月明多

一作何

竹枝詞二首

竹雞嘯處一聲聲  
山雨來時郎欲行  
蜀天恰似離人眼  
十日都無一日晴

水上摘蓮清的的  
泥中采藕白纖纖  
却笑同根不同味  
蓮心清苦藕芽甜

集中又載紅蓮白藕詩用意相近其一云紅蓮白藕  
兩相宜欲采臨流意轉遲蓮子總甜心獨苦藕芽雖  
美腹多絲其二云采蓮采藕湖水濁阿儂蹋歌  
郎賞音多虛少實如郎意外甜內苦似儂心

題定海樂節婦劉氏沿江泣尋夫屍卷

怨入江雲結畫陰潮痕清淺淚痕深白頭重見黃泉下  
方盡寒鐙一寸心

題唐申王三駿圖

三駿英英出渥洼太平芻束飽天家誰知百戰平河北  
汗血功歸獅子花

戲題明皇照夜白圖

天上麒麟天下稀月中幾送八姨歸君王寓目應追悔  
誤看垂鸞度羽衣



武昌南湖度夏

湖山新雨洗炎埃萬朶青蓮鏡裏開日暮菱歌動南浦  
女郎雙槳盪舟來

贈李仙姑

何年萼綠華來降地仙家花擁青鸞節香隨白鹿車清  
輝迴雪月玄想結雲霞不赴瑤池宴挑開幾度花

次小孤山

峽束千雷怒擊撞危峰屹立壓驚瀧山聯廬霍朝三楚

水落荆揚限九江鎮海重關當第一擎天孤柱故無雙  
珮環月夜知何處露溼蓬萊玉女窗

題風雨歸舟圖

昔向滄浪弔獨醒中流風雨正揚舲江空風卷潮頭白  
野曠雲迷峴首青挂席正思遺珮浦推蓬已過濯纓亭  
襄陽耆舊今安在撫几長歌對畫屏

寄張左轄

張生脫略今有年食無梁肉眠無羶丈夫既與世不偶

貧賤肯為人所憐齊省已喜孟光敬翦髮況聞陶母賢  
拂衣歸來好共隱與爾共耕沮溺田

元帥濟雅穆爾丹

濟雅穆爾丹字元德鶴年之從兄至正間進士官  
浙東僉都元帥事

寄穆爾古蘇院判

將軍辛苦事戎行麾下論兵總俊良沙漠蘇鄉多感慨  
鑑湖賀老自清狂風塵滿眼青山舊天地無私白髮長

萬里君親俱在念扁舟何日賦滄浪

遊定水寺寄杜堯臣

水紋藤簟竹方牀山閣重陰雨後涼  
新月梧桐秋已老

碧梧

一作孤燈

機杼夜初長白魚入饌松醪熟紅稻供炊筍

脯香雲樹芝泉隨處好一時清賞肯相忘

題天童寺朝元閣

海內兵塵已十年上方鐘鼓獨依然  
史臣錫號承天寵  
中使匭香出御筵  
山列九龍蟠紫翠樓開五鳳敞雲煙

籃輿亦有登山約擬聽松風借榻眠

贈陳章甫

三十年前鬢未蒼曾陪宰相入鴈行  
解衣換酒尋常醉躍馬看花取次忙  
亂後已非前日夢老來那復少年狂  
黃冠野服新妝束穩把長竿釣海鄉

鶴年弟盡弃紉綺故習清心學道特遺楮帳資其  
澹泊之好仍侑以詩

誰擣霜藤萬杵勻製成鶴帳隔塵氛  
香生蘆絮秋將老

夢熟梅花夜未分枕上不迷巫峽雨牀頭常對剡溪雲  
竹鑪松火茶煙暖一段清貞盡屬君

秋過弟鶴年書館夜話

弟兄惟吾老宗族有君知萬里尚為客百年能幾時秋  
清妨熟寐夜靜話貞期明日怱怱別還生兩地思

題畫竹為董文中賦

雨過蛟龍起風生翡翠寒但存清白在日日是平安

應奉阿里沙

阿里沙字允中鶴年之次兄至正間進士官應奉翰林文字

題九靈山房圖

戴叔能讀書處時叔能避地明州

夢裏家

一作鄉

山十載違丹青咫尺是耶非墨池新水春

還滿書閣浮雲晚更飛張翰見機先引去管寧避亂久

忘

一作無

歸人生若解幽棲意處處林丘

一作立園

有蕨薇

題前餘姚州判官葉敬常海隄遺卷

潮汐東來勢蹴天一隄橫捍萬家金陵遷谷變人誰在

海宴河清事獨賢  
曉日山川申禹跡  
秋風禾黍有虞田  
河渠他日書成績  
應並宣房與代傳

題鍾秀閣

為東湖古鼎  
銘長老作

檻外澄湖平不流  
窗間疊嶂屹將浮  
煙霞五色錦屏曉  
風月雙清瑤鏡秋  
蘼蔔濃香吹法席  
芙蓉涼影蕩仙舟  
結巢擬傍雲松住  
回首朝簪媿未投

吳惟善

惟善字

缺

鶴年表兄樊川人



寄武昌諸友


黃鵠山前漢水濱一時英俊總能文  
金釵佐酒年俱少銀燭鈔書夜每分  
鴈背魚沈勞遠思狼貪羊狠絕前聞  
兵戈故國知誰在目送西南日暮雲

寄東海鶴年賢弟

鶴皋東望接三山海上羣仙日扣關  
虎守月鑪丹鍊就龍吟霜匣劍飛還  
故園松菊餘三逕老屋煙霞恰半間  
為問林泉逃世者如公今有幾人閒

小遊仙

河漢無聲海月寒  
長鯨吸浪洞庭乾  
一聲鐵笛風雲動  
人在危樓第幾闌



元詩選初集卷六十三